

Kitang LUNGSURANON sa Siaton

Kamatuoran
Pagbuligay
Lungsod mauswagon



Ang gisugdan nga Cell Site sa Bell Company

Vol. 6 No. 3

Pebrero 1-15, 2016 P6.00

14 anyos gilugos patay, suspetsado naghikog

Gisugo sa iyang inahan ang 14 nayos nga batang babaye paglalag sa baboy didto sa balay sa iyang igsoon alas 5:00 sa hapon niadtong Enero 27, sitio Cansilay, Barangay Casalaan. Wala na makauli human paglalag ug nakaplagan pagka-ugma ang iyang patayng lawas nga gigulgol ang liog gamit

ang sundang ug nagkadugo ang kinatawo.

Lakip kini sa lakbit saysay sa inahan sa biktima nga miangkong nga nabalaka sila kay wala pa nauli ang iyang anak. Enero 28 nakitan ang iyang patayang lawas. Matud sa inahan nga mitabang pa isip testigo ang suspetsado nga giilang nga

si Eric Quitay, 23 anyos, pagyayong sa patayng lawas ug mibilar pa siya sa Siaton St. Peter Funeral Home. Kini subay sa pasiuna nga imbestigasyon nga gihimo sa Scene of the Crime Operatives (SOCO). Si Quitay maoy puyo-uyo sa ig-agaw sa biktima.

Sa pakisusi nga gihimo sa SOCO si Quitay niangkong nga iyang nakit-an ang duha ka lalaki nga naghukas didto sa balay sa biktima samtang nag-uma siya. Apan matud pa nga imposible kini kay atop ra man ang makita gikan sa iyang umahan. Kini **padayon sa panid 3**

SIMVA mireklamo sa bag-ong kontrata

Ang mga miyembro sa Siaton Market Vendors Association (SIMVA) nagmulog nga wala sila hatagi og bag-ong permit ug kontrata sa ilang pwesto, ug balhinon usab sila.

Ang mga tindera niingon nga lima ka tuig na ang milabay sukad giaprobahan ang kontrata sa ilang pwesto sa tiyangge sa administrasyon ni kanhi-Mayor Bingbing Arbolado. Karon bag-ohon na kini, apan adunay bag-ong gipangayo ang munisipyo nga duha ka bulang deposito

ug usa ka bulan nga *advance*, basi sa Market Code.

Apan matud nila maglisod gayod ang mga namaligya kay dako ra kaayo kini alang kanila. Gusto nila nga magbayad sa matag adlaw og P15 sama sa isdaan ug karnehan, ug P10 sama sa nagtinda og utanon.

Hinon adunay plano nga usbon o amendahon ang Market Code. Matud ni Kag. Izra Singson nga ilang i-amendar ang *kontrata* pagwala sa duha ka bulang deposito ug usa ka bulang **padayon sa panid 3**



Ang suspetsado nga si Lucio Lauron Gadingan ug ang mga miembro sa PAIDSOT ug Siaton PNP uban sa presensya ni Brgy. 2 Kapitan Adriano S. Macatiguib nga mi-imbentaryo sa nakuhang ginadiling droga.

Gisikop tungod sa ginadiling droga

Gisikop si Lucio Lauron Gadingan, 35 anyos, taga Barangay 2, Siaton sa Pebrero 5, alas 4:10 sa hapon sa PAIDSOT (Provincial Anti-Illegal Drugs Special Operation Task Group),

PIB/SOG (Provincial Intelligence Branch/Special Operations Group) ug Siaton-PNP.

Basi sa imbentaryo sa PAIDSOT ug Siaton PNP **padayon sa panid 3**

EDITORIAL**Panghitabo**

Nabaniog karon ang paglugos-patay sa usa ka 14 anyos nga batang babaye. Makaluluoy kaayo ang iyang gidangatan. Sakit kaayo alang sa usa ka pamilya nga mahitabuan sa ingon. Sa laktud nga pagkasulti, dili lalim.

Apan unsa man gayud ang hinungdan nga duna may mga panghitabo nga sama niini? Kun ayuhon sa pagsubay, daghang mga hinungdan o factors nga angayan nga susihon ug tun-an aron malikayan ang samang panghitabo.

Tinuod nga dili kalikayan nga sa paglambo sa komunidad ug sosyedad, daghan usab nga mga kalikuhan og mga kausaban ang mahitabo.

Apan nunot niining maong mga kausaban, gikinahanglan ang hugot nga pag-amuma ug minahalay sa pamilya, pangaliya sa kahitas-an ug labaw sa tanan ang pag-amping.

Sa pagsaulog niining Valentine's Day o Adlaw sa Gugma hinaut unta nga dili lamang pisikal nga pagpakita og pagpabati sa gugma ang himoon.

Ang gugma maoy tuburan sa tanan. Uban sa gugma motumaw ang paghatag og importansya sa usag-usa; pagpakiglambigit sa isig ka tawo; paghatag og respeto sa isig-kaingon; labaw sa tanan pagpaminaw sa rason og pagpalambo og pagpalapad sa panghunahuna alang sa kaayuhan sa tanan.

Isip usa ka lungsuranon aduna dakong responsabilidad dili lamang sa alang imong kaugalingon, apan alang sa imong pamilya, ka tagi-lungsod ug sa tibuok nasud. Kini mao ang tinuod nga bulok sa gugma.

Apan subay sa mga panghitabo karon.. lugos didto, patay diri, baligya ug gamit og drugas, kawat, korapsyun, ug uban... nilngig kaayo nga palandungon.

Kini nga hinungdan nga magmata na ang tanan. Hinumdumi nga ang gamay nga butang nga imong gihimo karon, duna nay dakong tugbang sa umaabot.

Lihok na. Pagpakabana.

**Bukhad***Susan Monte de Ramos-Soldwisch***RELIHIYON: Wa Epek?**

Aniay mga kamatuoran kabahin kanato:

1. Dinhi sa Asia kita ra baya ang nasod nga Kristohanon. Gara pa gayud kitang moangkon niini! Karon, nagpagawas na usab ang Transparency International og grado sa mga nasod mahitungod sa ilahang pagkakorap. Kabahin sa sektor sa gobyerno, kadtong may grado paduol sa 50 mao ang mga nasod diin GRABE ang korapsyon. Ang Pilipinas ania niining grupoha. Hinuon, na arang-arang man ang atong grado ilalom sa "Daang Matuwid".

Ang sector sa gobyerno o sector publiko napuno og mga Kristohanon. Kon korap ang gobyerno, walay lain kondili kitang mga Kristohanon gihapon ang nanghiphip, namakak, nangawat, nanulis, nangsoborno, nangabusar—sa atong isigkatawo.

2. Si Santo Papa Francisco midayeg sa mainiton nga pagka-Romano Katoliko natong mga Pilipino. Tuod, dasig kaayo ang atong pagsayaw sa Pit Senyor o pag-uban sa prosesyon sa Itom nga Nazareno. Samtang, nikaylap na ang paggamit sa ilegal nga droga nga makadaut gayud. Dili usab ikalimod ang pagdaghan sa mga mimabdos nga kabataan nga wala makasal.

3. Ang mga pangulo sa INC (Iglesia ni Cristo) -- mga magsoon ug ilahang inahan—nanag-away ug nagdumtanay tungod sa bahandi nga gikan sa amot sa mga miyembro nila, ug sa gahum nga makahatag og bahandi. Samot kadako ang problema kay misunod usab og away ang mga miyembro. Nakaako man galing ang mga pangulo sa

*padayon sa panid 4***REAKSYUN...**

Ang pagtukod sa usa ka pribado o pang publikong matang sa negosyo, naga dependi kini sa pagtugot sa pamahalaan aron pag aprubar sa gipasa nilang plano para sa pagtukod sa angay nga tukuron...ang pagtukod sa usa ka matang sa proyekto na may kinalaman sa pang pribado o pang publikong sektor, gakinahanglan kini sa pag tugot o pag aprubar sa mga namamahala sa gobyerno o opisyal sa kagamhanan. Gikinahanglan pa kini sa panaglantugi o panagsabot sa mga namamahala sa pamahalaan aron sa pag aprubar sa mamahimong proyekto. --*Bench Macapanas*

Sa akong pagsabot once nga ang proyekto nasugdan na gani unya naay complain puydi man na hunungon ..pending usa na siya then ug makompleto na ang mga papeles usa ipadayon ang maong proyekto. -- *Diane Siman*

Kitang Lungsuranon

Gimantala sa **KL Publishing**, Siaton, Neg. Or., Philippines,
Contact +63 927-144-5044 www.KitangSiatanon.com
 TIN: 420-321-172-000; Permit number: 13-0450

Publisher

Susan Monte de Ramos- Soldwisch

Editor-in-Chief

Melita "Bing" Aguilar

Copy Editor

Mirzah V. Rodriguez

Tigbalita / Manunulat

Grace Arcellana
 Eugene Jamandron
 Zephania Repollo

Kasabotan sa Kalinaw gipirmahan

Gihimo ang Pagpirma sa Kasabotan sa Kalinaw o Peace Covenant Signing 2016 ubos sa PNPP.A.T.R.O.L. PLAN 2030 uban sa PNP nga girepresentahan ni Officer-in-charge PCI Alvin Asonio Futalan, ug sa AFP, DILG, COMELEC, PPCRV ug mga kandidato sa eleksyon sa Mayo. Nahitabo ang pagpirma sa San Nicholas de Bari Parish Church, sa Pebrero 5, 2016, alas 6:00 sa buntag.

Ang Kasabotan sa Kalinaw



may katuyoan nga ang matag kandidato manumpa sa mosunod nga mga responsabilidad alang sa umalabot nga eleksyon: manalipod ug mosubay sa bata kang prinsipyo sa demokrasya nga ang kagahom o soberanya anaa sa katawhan ug ang tanang pagbulut-an o otoridad nagagikan kanila; motahod sa katungod sa pagbotar isip usa ka ligdong nga buluhaton sa kagahom o soberanya; mopatunhay sa kabalaan sa balota nga maoy labing taas nga pagpadayag sa kagahom o soberanya; manalipod ug mosubay sa mga prinsipyo sa kalinaw ug pagsunod sa balaod diha sa ilang pagkampanya ug mga kalihokan sa among partido; molikay taman sa mahimo sa paggamit sa kusog, panghadlok, pangilad ug pagdagmal alang sa among interes sa politika; dili gayod motugot nga ang nagsuporta kanamo mogamit sa panlimbong ug pagpalit og boto sa wala pa, o panahon, o human

sa eleksyon; ug magsubay sa kaangayan ug hustisya kauban sa among kaatbang sa politika.

Si Fr. Casiano O. Salac misugyot nga ang katawhan mobotar uban ang kaalam ug subay sa ilang konsensya. Nanghinaot siya nga ang mahimong mangulo sa lungsod mao ang pangulo nga alang sa Diyos, sa tawo, sa nasod, ug sa kinaiyahan. Matud niya, mopili sila nga tinud-anay gikan sa kasingkasing. Nanghinaot

usab siya sa hapsay ug malinawon nga eleksyon. Miingon siya nga si Jesus mianhi sa pag-alagad ug dili aron alagaran.

Si PCI Alvin Asonio Futalan miingon sa iyang mensahi nga magserbisyo sila nga walay gidapigan nga grupo o partido nga mao usab ang gustong tumanon sa 79th IB.

Ang mga mipirma nga kandidato mao sila si Teopisto Ray L Yap III, Vincent Emil T Arbolado, Teodorico L. Yap, ug mga konsehales nga sila si Edgar K Ragay, Steve K. Macahig, Izraelita C Singson, William E. Kirit, Judith G. Lagos, Donald D. Gadingan, Melvin M. Villa, Marcial J. Dingal, Arnulfo R. Bon, Thelma Q. Rapada, Rowel C. Gabo, Espirato P. Pileo, Miguel L. Dungog, Norberto E. Ragay, Reynaldo A. Darias, Genesa Q. Teng, Abednego P. Gerona, Charity T. Jereza. Wala mipirma niadtong adlaw sa sila si Kag. Fritz Diaz, Mayor Alberto G. Ator ug Richard E. Sun.

Pabasa



Nagbasa si Rudy Garcia (taga Albiga) sa KL diha gawas sa FTMS samtang naghulat sa iyang asawa.



Si Mae An Tinambacan Alabata nagbasa usab sa KL samtang naghulat sa iyang anak nga nag-eskwela diha sa Brgy. Hall sa Poblacion 3.

Nagbasa sa KL ang mga tinun-an sa Sumaliring High School – (gikan sa wala) Regine Egoc, Michelle Jandog, Karen Egoc ug Melody Jandog.



14 anyos... gikan sa panid 1

ang unang nakapaduda sa pulis. Wala nagkadimao ang gi-estorya ni Quisay ngadto sa pulis maong gidudahan siya nga maoy nagpatay.

Sikupon na unta sa pulis si Quisay apan miikyas na kini. Gisunod nila didto sa iyang paryente sa San Miguel, Bacong apan wala na kini maabti. Enero 30, ang kaipon ni Quisay niluwat og pamahayag sa Siaton-PNP nga kadtong gabhiona natingala siya nganong nag-ilis og sinina si Quisay usa natulog nga dili man kini niyang naandang gibuhat. Namatikdan niya nga adunay dugo ang hinubong sanina niini maong misumbong siya sa polis.

Si PO3 Ma. Admiravilla Repollo Kinilitan sa WCPD sa Siaton PNP miingon nga dili matuohan ang mga taho sa suspetsado maong gidudahan na usab siya nga posibleng maoy naglugos ug mipatay sa bata. Mitago si Quisay didto sa Balanan sa iyang inahan ug

nagpauban sila sa kapitan sa pagsurender sa Siaton PNP. Wala gidala sa pakisusi o *inquest proceeding* ang suspetsado ug ang fiscal usab mipadala og mando sa pagbuhi niya aron pabalikon lamang sa Pebrero 15, 2016.

Miuli si Quisay balik sa Balanan kauban ang iyang inahan. Pagkasunod adlaw naghikog siya usa ka oras human milakaw ang iyang inahan. Nakit-an sa inahan nga nagbitay na ang patayng lawas sa anak. Nagbilin usab og sulat o *suicide letter* si Quisay sa iyang inahan nga nag-ingon kaniadto daghan na siyang gipatay mao nga panahon na usab nga iyang ibayad iyang kinabuhi.

Padayon pa ang pag-imbestigang sa SOCO. Gidala na sa SOCO ang sampol sa *laboratory* kung tinuod ba gayud nga si Quisay ang milugos ug mipatay sa batang babaye. Wala pa mahibal-i ang resulta.

Happy 1st Birthday



Emilly Phebe Mahabague

karon Pebrero 17!

Gikan sa imong Mama Liezel,
mga kaparyentihan ug higala.

Tubag Lungsuranon

Unsa ang kahulugan sa Valentines Day alang kanimo?

Ang tanan gikan sa kasingkasing. Dili lang bahin sa paris nga nagpadayag sa ilang pagbati ug gugma, apan bahin usab sa pagtabang sa uban labi na katong walay makaon, walay kapuyan ug nagkinahanglan og pagtagad ug pagmahal. Ang bulak, *card*, ug *chocolate* walay hinungdan kon dili nimo tabangan ang katawhan. (*Everything comes from the heart. It is not only about couples who will express their feelings, emotions and love; but it is also about helping others especially those who have nothing to eat, no place to stay and need care and affection. Flowers, cards, and chocolates will always be useless if you will not extend your help for humanity.*) -- **Dr. Jimuel Sun**

Kanang adlawa sa paghandum sa pista sa usa ka santos angay mopahinumdom nato nga ang gugma dili lang ipakig-ambit sa usa ka adlaw apan sa tibook kinabuhi. Sa mubong pagkasulti, Valentine's Day gyud unta kada adlaw! Kon duna kay kasingkasing nga lunsay ug naghunahuna sa uban, ang Pebrero 14 adlaw nga nagpahinumdom kanato nga "pinaagi lang sa kasingkasing nga makakita kitag husto...ang importante dili makita sa mga mata." (*That one day of commemorating a saint's feast should remind us that LOVE should NOT be shared only for a day but for a lifetime. In short, Valentines Day gyud unta kada adlaw! As long as you have a heart that's pure and unselfish, February 14 is a day that reminds us that "it is only through the heart that one can see rightly...what is essential is invisible to the eye."*) -- **Jeremy Mira**

Pamilya. -- **John Anthony Futalan Gainsan**

Adlaw sa pagselebrar para sa mga tawong gahatag og gugma ug nidawat og gugma. Selebrasyon sa mga pasakit og kalipay nga ghatag sa gugma. Basta tanan kabahin sa gugma (*all about love*). -- **Cherry May Tang Quirit**

SIMVA... gikan sa panid 1

advance. Mitabang sa mga mireklamo sila si Kag Fritz Diaz ug kanhi-Mayor Bingbing Arbolado aron pagpakgang sa maong problema diha sa tiyangge.

Anaa sa karaang kontrata nga ang nag-abang kinahanglan nga mobuhi sa ilang katungod ngadto sa buhatan sa mayor kung dili na sila ganahan sa ilang pwesto. Ang nag-unang mahimong

mopuli mao ang paryente. Usa sa rason nga gustong ipatuman ni Bise-Mayor Teddy Yap ang pag-usob sa kontrato mao ang mga kalapasan: dunay magpaabang sa ilang pwesto sa uban; dunay maggamit og sugnod pagluto sa karenderya; ug dunay molapaw sa ilang luna.

Matud ni Municipal Treasurer Alemita R. Kinol, bayaran ang tanang utang usa

tugutan pagbag-o sa kontrata. Ang nakabayad na sa duha ka bulang deposito ug usa ka bulang *advance* dili na kolektahan sa matag-adlaw.

Ang deposito ug *advance* ang kuhaan isip ilang bayad hangtod nga mahurot kini. Magbayad gayod sila aron dili sila mabug-atan.

Gikinahanglan

drayber ug helper

alang sa dugang kasayuran
adto lang sa

**Prince Store sa McKinley St.
Poblacion I, Siaton**

Bukhad... gikan sa panid 3

INC sa pagdiktat sa gobyerno kon kinsa ang dapigan niini.

Ang yano nga pangutana karon mao: Unsa diay pulos sa relihiyon ngadto sa katilingban? Kawang lang ba diay ang atong pagkaKristohanon nga wa epek, matud sa panultihon, sa atong pagkinabuhi isip lungsod, probinsya, o nasod?

Nagsugod na ang cuaresma. Magahinumdom na

usab kita sa pagsakripisyo ni JesuKristo alang kanato. Iapil nato kining mga pangutana sa atong paghinulsol. **Unsaon kaha nato ang atong kaugalingon aron mahimo ang Pilipinas nga iwag sa atong mga silingang nasod –sa tinuoray nga pagkaKristohanon ug dili lamang sa ngalan ug pasundayag?**